

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E O CONCELLO DE O BARCO DE VALDEORRAS (OURENSE) PARA A REALIZACIÓN DAS OBRAS COMPRENDIDAS NO PROXECTO "PECHES LATERAIS, PORCHE E DOTACIÓN DE ASEOS EN PISTA DEPORTIVA CUBERTA NO CEIP JULIO GURRIARÁN"

Santiago de Compostela, 22 de agosto de 2018

REUNIDOS

Dunha parte, _____, na súa condición de conselleiro de Cultura, Educación e Ordenación Universitaria, en virtude do seu nomeamento mediante o Decreto 148/2016, do 13 de novembro, e no uso das atribucións que lle confire o Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria.

Doutra, _____, na súa condición de alcalde do Concello de O Barco de Valdeorras, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local.

Ambas as partes recoñécense a capacidade legal necesaria para formalizar este convenio de colaboración, consonte os principios de colaboración, cooperación, coordinación e eficacia que deben presidir as actuacións das administracións públicas, e

EXPOÑEN

I. O CEIP Julio Gurriarán (O Barco de Valdeorras), conta cunha pista deportiva cuberta que é preciso pechar lateralmente de maneira que permita o seu uso nos meses de inverno e nos días de choiva, así como instalar aseos, vestiarios, almacén e espazo cuberto contiguo, de forma que se garanta a súa plena operatividade en condicións de seguridade e confort para a comunidade educativa, así como a súa utilización, fóra do horario lectivo, polos colectivos da poboación do entorno.

Para acadar a plena operatividade desta instalación deportiva resulta necesario realizar unha serie de obras consistentes na substitución da cuberta con panel con illante intermedio, execución dun peche lateral de paneis prefabricados de formigón con illamento na parte inferior e paneis de policarbonato celular na parte superior, que garantan a iluminación natural, así como a construción de aseos e vestiarios, xunto cun amplo espazo cuberto que permita o seu uso nos días de choiva, como espazo alternativo á pista que se pecha para uso deportivo . Deste xeito a infraestrutura disporá das condicións de illamento e confort para impartir a materia de educación física e para as actividades deportivas do alumnado do centro, así como para a súa utilización fóra do horario lectivo polos clubs, asociacións e poboación en xeral do concello, nos termos establecidos na cláusula sexta deste convenio.

Estas actuacións ascenden á contía de 441.424 euros en concepto do investimento nesta instalación deportiva sita nunha parcela de titularidade municipal, afecta ao uso educativo do CEIP Julio Gurriarán, e deportivo. No actual contexto de austeridade orzamentaria este importante desembolso económico non se pode levar a cabo sen a colaboración administrativa entre as administracións implicadas: a Consellería de Cultura, Educación e Ordenación Universitaria e o Concello de O Barco de Valdeorras.

II. O Concello de O Barco de Valdeorras ven prestando unha especial atención na promoción de toda clase de deportes, colaborando coas entidades, asociacións e clubs do concello na construción e remodelación de instalacións deportivas, coa finalidade de garantir ás persoas usuarias a práctica deportiva nunhas condicións adecuadas, de modo primordial orientadas ao deporte de base da poboación en idade escolar.

III. Os convenios entre as administracións públicas constitúen o instrumento adecuado para desenvolver a súa cooperación en cuestións de interese común, tal como establecen os artigos 47 e seguintes da Lei 40/2015, de 1 de outubro, de réxime xurídico do sector público, 57 da Lei 7/85, de 2 de abril, reguladora das bases de réxime local e 198 e seguintes da Lei 5/97, de 22 de xullo, de administración local de Galicia.

IV. A lexislación de réxime local establece como unha das competencias propias dos concellos a promoción do deporte e instalacións deportivas e de ocupación do tempo libre, así como a conservación, mantemento e vixilancia dos edificios de titularidade local

destinados a centros públicos de educación infantil, de educación primaria ou de educación especial.

En virtude do exposto, ámbalas dúas partes acordan a subscrición do presente convenio de acordo coas seguintes

CLÁUSULAS

Primeira. **Obxecto**

O obxecto do presente convenio é articular as bases de colaboración entre a Consellería de Cultura, Educación e Ordenación Universitaria e o Concello de O Barco de Valdeorras para levar a cabo as obras do proxecto de "Peches laterais, porche e dotación de aseos no CEIP Julio Gurriarán (O Barco de Valdeorras)".

Segunda. **Orzamento**

O importe destas actuacións ascende a contía de 441.424 euros (IVE incluído), que corresponde á execución da obra

Terceira. **Financiamento**

A consellería asumirá a redacción e aprobación do proxecto técnico, así como os custos derivados dos servizos de dirección e de seguridade e saúde da obra con cargo aos seus orzamentos.

A realización das obras será financiada pola Consellería de Cultura, Educación e Ordenación Universitaria e o Concello de O Barco de Valdeorras, de acordo coas achegas que se indican:

Institución	Importe	Aplicación orzamentaria
Consellería	291.424	10.10.422A.632.1
Concello	150.000	

Se na fase de execución da obra os custos contemplados nesta cláusula resultan incrementados, as partes financiarán o dito incremento na mesma proporción na que

participan. O dito incremento deberá realizarse previa formalización da addenda correspondente, e trala nova autorización do Consello da Xunta, en función do establecido no artigo 45.2 da Lei 8/2017, do 26 de decembro, de orzamentos xerais da Comunidade Autónoma para 2018.

Cuarta. *Obrigas da Consellería de Cultura, Educación e Ordenación Universitaria*

A consellería asumirá a redacción do proxecto e levará a cabo a licitación, dirección, execución e recepción das obras incluídas no proxecto técnico, que non poderán superar a contía de 441.424 euros.

A posible baixa no importe de adxudicación respecto do de licitación empregarase noutras melloras necesarias na pista, renunciando o concello ao reintegro da mesma.

A consellería asumirá o custo da obra no importe establecido na cláusula terceira, e quedará obrigada a destinar os fondos percibidos do Concello de O Barco de Valdeorras ao financiamento do obxecto deste convenio, recollido na súa cláusula primeira.

Así mesmo, comprométese a que esta instalación poida ser destinada ao uso xeral para actividades deportivas ou culturais que se organicen fora do horario lectivo nos termos da cláusula sexta deste convenio.

Quinta. *Obrigas do Concello de O Barco de Valdeorras.*

O concello porá a disposición da consellería, libre de cargas e gravames, a pista deportiva cuberta do CEIP Julio Gurriarán coa finalidade de levar a cabo as obras previstas no proxecto e concederá os permisos e as autorizacións que fosen precisas para levar a cabo o mesmo.

O concello asumirá o custo da obra no importe establecido na cláusula terceira mediante a achega das cantidades correspondentes, a cuxo efecto certifica a inclusión nos seus orzamentos e renuncia a reter da aportación da corporación, calquera tipo de tributo con motivo das obras.

O ingreso efectivo da achega levarase a cabo polo concello de acordo co ritmo de execución da actuación e no prazo de 15 días dende que lle sexa requirido pola Consellería de Cultura, Educación e Ordenación Universitaria. Dito ingreso realizarase na conta xeral da Xunta de Galicia, _____ indicando o concepto e referencia do convenio.

Corresponde ao concello asumir o mantemento e a conservación das instalacións deportivas obxecto de actuación, dende o día seguinte ao da formalización da acta de recepción das obras.

Sexta. *Condicións de uso das instalacións deportivas*

As instalacións deportivas do CEIP Julio Gurriarán obxecto das actuacións previstas neste convenio poderán ser abertas ao **uso xeral** da poboación fóra do horario lectivo **para fins educativos, deportivos e culturais** sempre que non se interfira na programación das actividades do centro e que se garanta a súa correcta utilización. A consellería e o concello acordarán as fórmulas de colaboración que permitan a efectividade desta cláusula sempre nos termos e condicións previstos no Convenio marco de colaboración entre a FEGAMP e a consellería sobre o uso de instalacións deportivas de titularidade da consellería subscrito o 16.10.2014.

Sétima. *Comisión de seguimento e control*

Créase unha comisión mixta de carácter paritario entre as dúas institucións asinantes para o seguimento e control do cumprimento deste convenio e para propoñer a resolución das dúbidas de interpretación e das controversias derivadas da súa execución. A comisión estará integrada por tres persoas en representación da consellería e outras tres en representación do concello. A presidencia corresponderá a unha das persoas representantes da consellería. Esta comisión reunirse no prazo de tres días contados dende a petición expresa de calquera das partes.

Oitava. *Vixencia do convenio*

O presente convenio entrará en vigor na data da súa sinatura e terá vixencia ata o 31 de decembro de 2018. A vixencia do presente convenio poderá prorrogarse coa conformidade expresa das partes intervenientes no caso de que non se rematasen as obras previstas nel.

Novena. *Resolución*

Será causa de resolución o incumprimento das obrigas derivadas deste convenio.

Décima. *Xurisdición*

O presente convenio ten natureza administrativa. As partes quedan sometidas á xurisdición contencioso-administrativa, a falta de entendemento previo pola comisión citada na cláusula sétima, para a resolución das posibles controversias sobre a interpretación e o cumprimento do convenio.

En proba de conformidade con canto antecede, asinan este convenio por duplicado exemplar no lugar e data arriba indicados.

Pola Consellería de Cultura, Educación e
Ordenación Universitaria

Polo Concello de O Barco de Valdeorras
